

VENDIM
Nr. 16, datë 23.1.2020

**MBI LICENCIMIN E SHOQËRISË “DIEZELA” SHPK, NË VEPRIMTARINË E
PRODHIMIT TË ENERGJISË ELEKTRIKE NGA HEC-i “LJUSA”, ME KAPACITET
TË INSTALUAR 1980 kw**

(ndryshuar me vendimin nr. 218, datë 4.7.2023; nr. 258, datë 23.8.2023)

(i përditësuar)

Në mbështetje të nenit 16 dhe nenit 37, pika 2, germa “a”, të ligjit nr. 43/2015, “Për sektorin e energjisë elektrike”, të ndryshuar, nenit 4, pika 1, germa “a”, nenit 5, pika 1, germa “a” dhe nenit 13, të “Rregullores për procedurat dhe afatet për dhënie, modifikimin, transferimin, rinovimin ose heqjen e licencave në sektorin e energjisë elektrike”, të miratuar me vendimin e Bordit të ERE-s nr. 109, datë 29.6.2016, si dhe nenit 15, të “Rregullores së organizimit, funksionimit dhe procedurave të ERE-s”, miratuar me vendimin e Bordit të ERE-s nr. 96, datë 17.6.2016, Bordi i ERE-s, në mbledhjen e tij të datës 23.1.2020, mbasi shqyrtoi relacionin e Drejtorisë së Licencimit, Autorizimeve dhe Mbikëqyrjes nr. 67/2 prot., datë 12.7.2019; relacionin plotësues nr. 89/3 prot., datë 11.9.2019 dhe relacionin nr. 19/3 prot., datë 18.1.2020, “Për licencimin e shoqërisë “Diezela” sh.p.k., në veprimtarinë e prodhimit të energjisë elektrike, nga HEC-i ‘Ljusa’, me kapacitet të instaluar 1980 mw”,

konstatoi se:

- Bordi i ERE-s, me vendimin nr. 82, datë 31.5.2019, filloi procedurën për licencimin e shoqërisë “Diezela” sh.p.k., në veprimtarinë e prodhimit të energjisë elektrike nga HEC-i “Ljusa”, me kapacitet të instaluar 1980 kW.

- Në vijim të kësaj vendimmarrje, ERE, me shkresën nr. 32/26 prot., datë 3.6.2019, ka kryer njoftimin në median e shkruar për fillimin e kësaj procedure dhe në përfundim të afatit të përcaktuar në nenin 10, pika 11, të “Rregullores për procedurat dhe afatet për dhënie, modifikimin, transferimin, rinovimin dhe heqjen e licencave në sektorin e energjisë elektrike”, në datën 17.6.2019, nuk rezultoi të ketë vërejtje apo ankesa nga palët e treta, lidhur me aplikimin e bërë nga shoqëria “Diezela” sh.p.k., për licencim në veprimtarinë e prodhimit të energjisë elektrike.

- ERE, me shkresën nr. 316/1 prot., datë 5.6.2019, ka përcjellë pranë shoqërisë njoftimin e vendimit të fillimit të procedurës dhe kërkesën për plotësim të dokumentacionit të munguar, i cili konsistonte si më poshtë:

- Dokumentacioni juridik, administrativ dhe pronësor neni 9, pika 2; germa “d” (vërtetimi nga Prokuroria dhe Gjykata për përfshirje ose jo në një proces penal të drejtuesve të shoqërisë); germa “g” (dokumente që vërtetojnë pronësinë e aplikuesit në zonat ku do të shtrihet projekti (kontrata shit-blerjeje, kontrata qiraje, akte dhurimi, kontrata premtim shit-blerje, marrëveshje me subjektet që kanë në pronësi zonat ku shtrihet projekti). Në lidhje me këtë kërkesë të rregullores, duke qenë se afati i kontratës së qirasë ishte një vit pa të drejtë rinovimi, iu kërkuar shoqërisë të bëjë me dije ERE-n nëse ka pasur më tej komunikime për zgjatjen e afatit të kësaj kontrate, me qëllim mbulimin e periudhës së licencimit.

- Dokumentacioni teknik për HEC-in, neni 9, pika 4.1.1, të dhëna teknike për HEC-in, neni 9, pika 4.1.2, të dhëna për bllokun e transformimit dhe lidhjen me sistemin, neni 9, pika 4.1.4, dokumentacioni tekniko-ekonomik, germa “a”, studimi i fizibilitetit, neni 9, pika 4.1.5, leje nga institucione të tjera, germa “b” (leja e përdorimit të ujit nr. 152 prot., datë 8.1.2019, miratuar me vendimin e Këshillit të Basenit Ujor Mat nr. 4, datë 22.12.2017, “Për miratimin e lejes së përdorimit të ujit për prodhim të energjisë elektrike, nëpërmjet ndërtimit të HEC-it ‘Ljusa’, nga subjekti

‘Diezela’ sh.p.k., lumi Mat, përroi i Zallit të madh, degë e përroit të Ljusës, degë e lumit Mat në fshatin Gjalisht, Bashkia Mat, qarku Dibër”, është e vlefshme për periudhën 22.12.2017–22.12.2022.

- Shoqëria “Diezela” sh.p.k., me shkresën e protokolluar në ERE nr. 316/2 prot., datë 21.6.2019, ka përcjellë dokumentacionin e kërkuar më sipër.

- ERE, në datën 5.7.2019, zhvilloi një seancë dëgjimore me përfaqësues të shoqërisë “Diezela” sh.p.k. për të sqaruar më tej situatën e pronësisë.

- Shoqëria “Diezela” sh.p.k. ka depozituar në ERE urdhrin e Ministrisë së Turizmit dhe Mjedisit, me nr. 289, datë 24.8.2018, “Për heqjen nga fondi pyjor dhe kullësor publik të sipërfaqes prej 0.13 ha në ekonominë pyjore ‘Balgjaj’ dhe ‘Derjan 1’, të Bashkisë Mat, për ndërtimin e HEC-it ‘Ljusa’ nga shoqëria ‘Diezela’ sh.p.k.”. Sipas këtij urdhri, kjo sipërfaqe do të përdoret si shesh ndërtimi për HEC-in “Ljusa”. Shoqëria ka depozituar edhe kontratën e qirasë nr. 1460 prot., datë 5.6.2018, “Për dhënie në përdorim të fondit pyjor, kullësor publik, shoqërisë “Diezela” sh.p.k. për ndërtimin e HEC-it “Ljusa”, të lidhur midis Bashkisë Mat dhe shoqërisë “Diezela” sh.p.k. Objekti i kësaj kontrate konsiston në dhënien me qira të fondit pyjor, kullësor për ndërtimin e HEC-it “Ljusa”. Kjo kontratë mban një afat njëvjeçar që fillon nga e nesërmja e datës së nënshkrimit të saj.

- Shoqëria “Diezela” sh.p.k., me shkresën e protokolluar në ERE nr. 316/2 prot., datë 21.6.2019, ka depozituar “Amendim për shtesë afati” nr. 1575 prot., datë 12.6.2019, me objekt: “Zgjatjen e afatit të kontratës me Bashkinë Mat për përdorimin e fondit pyjor, kullësor publik, për ndërtimin e HEC-it ‘Ljusa’.” Nëpërmjet këtij amendimi, afati i kontratës shtyhet me 1 vit, duke filluar nga data e përfundimit të kontratës bazë e cila mbetet e pandryshuar, përveç afatit të shtyrë edhe me një vit tjetër (kontrata bazë ka përfunduar 6.6.2019).

- Shoqëria “Diezela” sh.p.k., në cilësinë e mbajtësit të miratimit përfundimtar me nr. 2413/6 prot., datë 15.12.2017, dhe në zbatim të VKM-së nr. 822, datë 7.10.2015, “Për miratimin e rregullave dhe procedurave të ndërtimit të kapaciteteve të reja prodhuese të energjisë elektrike, që nuk janë objekt koncesioni”, të ndryshuar, ka lidhur me MIE-n kontratën me nr. 15 rep., dhe nr. 8 kol., datë 10.1.2018, “Për ndërtimin, shfrytëzimin dhe administrimin e hidrocentralit ‘Ljusa’, me kapacitet të instaluar 1980 kW, në përroin e Zallit të madh, degë e përroit të Ljusës, kjo e fundit degë fundore e krahut të djathtë të lumit Mat, Bashkia Mat, qarku Dibër”.

- Në mbledhjen e datës 22. 7.2019, u relatua relacioni nr. 67/2 prot., datë 12.7.2019, “Për licencimin e shoqërisë ‘Diezela’ sh.p.k. në veprimtarinë e prodhimit të energjisë elektrike nga HEC-i “Ljusa” me kapacitet të instaluar 1980 kW”.

- Nga ana e Bordit të ERE-s u shty ky miratim, pasi lindi nevoja për sqarime në lidhje me paraqitjen në ERE të urdhrave të MIE-s për pezullimin dhe rifillimin e punimeve, ecurinë e procesit të pajisjes me leje ndërtimi, deklarimin e bërë për kalimin në pronësi të shoqërisë “Diezela” sh.p.k., të sipërfaqes së përcaktuar në kontratën e qirasë pas përfundimit të punimeve dhe gjobës nga tatimet, afatet e lejes mjedisore dhe asaj të përdorimit të ujit.

- ERE i është drejtuar shoqërisë “Diezela” sh.p.k. me shkresat nr. 316/5 prot., datë 8.8.2019, dhe nr. 316/6 prot., datë 30.8.2019, duke i kërkuar të bëjë plotësime dhe të japë sqarime në lidhje me sa më sipër.

- Në vijim, shoqëria “Diezela” sh.p.k. me shkresën e protokolluar në ERE me nr. 316/7 prot., datë 2.9.2019, ka paraqitur në ERE shpjegimet dhe plotësimet përkatëse.

- Shoqëria “Diezela” sh.p.k. ka dërguar në ERE urdhrin nr. 48, datë 30.1.2019, të ministres së Infrastrukturës dhe Energjisë, “Për verifikimin e zbatimit të kushteve të kontratave koncesionare, objekt i VKM-së nr. 822, datë 7.10.2015, nga burimet hidrike të energjisë”, me anë të të cilit urdhërohet fillimi i procesit të verifikimit të zbatimit me përpikmëri të projektit dhe respektimit të kushteve mjedisore, kapacitetit prodhues dhe çdo angazhimi tjetër kontraktor.

- Shoqëria “Diezela” sh.p.k. ka depozituar në ERE kopje të konfirmimit për kryerjen e aplikimit *online* për pajisje me leje ndërtimi. Sa më sipër, rezulton se pa u pajisur me leje ndërtimi kjo e fundit nuk mund të përfundojë regjistrimi i sipërfaqes së godinës së centralit, duke qenë se ky dokument i është kërkuar nga ZRPP-ja.

- Shoqëria e ka dokumentuar me vërtetimin e Drejtorisë Rajonale të Tatimeve Tiranë me nr. T01336665, datë 31.8.2019, që ka përcjellë bashkëlidhur shkresës nr. 316/7 prot., datë 2.9.2019, se nuk ka detyrime të sigurimeve shoqërore pa paguar.

- Shoqëria ka paraqitur në ERE “Leje për përdorim të Burimit Ujor” nr. 152 prot., datë 8.1.2018, miratuar me vendimin nr. 4, datë 22.12.2017, “Për miratimin e lejes së përdorimit të ujit për prodhim të energjisë elektrike, nëpërmjet ndërtimit të HEC-it ‘Ljusa’, nga shoqëria “‘Diezela’ sh.p.k., lumi Mat, përroi i Zallit të madh, degë e përroit të Ljusës, degë e lumit Mat, në fshatin Gjalisht, Bashkia Mat, qarku Dibër.”. Kjo leje është e vlefshme për periudhën 22.12.2017–22.12.2022.

- Shoqëria ka përcjellë në ERE, vendim për VNM-në paraprake me nr. 1020 prot., datë 26.4.2017, dhe nr. 17 vendimi, me numër identifikimi 280. Ky vendim është lëshuar për të zhvilluar projektin “Shfrytëzim i kapaciteteve hidroenergjetikë të përroit të ‘Ljusës’”, nga shoqëria “Diezela” sh.p.k. me vendndodhje të HEC-it “Ljusa” në Dibër, me kapacitet të instaluar 1,980 kW. Në këtë vendim përcaktohet se projekti nuk duhet ti nënshtrohet VNM-së së thelluar. Ky vendim është i vlefshëm vetëm pasi shoqëria licencohet nga institucionet përkatëse. Mosfillimi i veprimtarisë brenda një periudhë 2-vjeçare sjell si pasojë e pavlefshmërisë së vendimit për ushtrimin e tij. Ky vendim është i vlefshëm pasi subjekti të pajiset me leje shfrytëzimi ujqor nga KBU-ja përkatëse.”.

- Shoqëria është pajisur me lejen e ujit, me vendimin nr. 4, datë 22.12.2017, të Këshillit Kombëtar të Ujit. Duke marrë në konsideratë edhe faktin se shoqëria nuk ka filluar veprimtarinë për të cilën lëshohet leja/nuk ka filluar ndërtimin e veprës, “Leja Mjedisore” nr. 1020 prot., datë 26.4.2017, dhe nr. 17, vendimi me numër identifikimi 280, rezulton e përfunduar në datën 22.12.2019.

- Aplikimi i shoqërisë “Diezela” sh.p.k., plotëson pjesërisht kërkesat e parashikuara nga ERE në “Rregulloren për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, si më poshtë:

- formati i aplikimit (neni 9, pika 1, gërmat: “a”, “b”, “c”), është plotësuar;
- dokumentacioni juridik, administrativ dhe pronësor (neni 9, pika 2, gërmat: “a”, “b”, “c”, “d”, “e”, “f”), është plotësuar;
- dokumentacioni financiar dhe fiskal (neni 9, pika 3, gërmat: “a”, “b”, “c” dhe “d”), është plotësuar;
- dokumentacioni teknik (neni 9, pika 4.1.1, pika 4.1.2, pika 4.1.3, gërmat: “a”, “b”, “c”, “d”; pika 4.1.4, gërmat: “a”, “b”, “c”, “d”, “e”; pika 4.1.5, gërmat: “a”, “b”, “c”), është plotësuar;
- leje nga institucionet e tjera (neni 9, pika 4.1.5, gërmat: “a”, “b”), është plotësuar;
- dokumentacioni i plotësuar pjesërisht rezulton:
- leje nga institucionet e tjera, (neni 9, pika 4.1.5, gërma “c”).

Kontrata e lidhur midis METE-s dhe subjektit “Diezela” sh.p.k., ka një afat 49-vjeçar, por ERE, në zbatim të nenit 38, të ligjit “Për sektorin e energjisë elektrike”, të ndryshuar, dhe nenit 5, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, nuk mund të japë, për veprimtarinë e prodhimit të energjisë elektrike, një licencë me afat më të madh se 30 vjet.

Për gjithë sa më sipër cituar, Bordi i ERE-s,

VENDOSI:

1. Të licencojë shoqërinë “Diezela” sh.p.k. në veprimtarinë e prodhimit të energjisë elektrike nga HEC “Ljusa” me kapacitet të instaluar 1980 kW, për një afat 30-vjeçar (duke filluar nga data 23.1.2020).

2. Shoqëria “Diezela” sh.p.k. duhet të depozitojë në ERE lejen e rinovuar të përdorimit të burimit ujor sipërfaqësor për prodhim hidroenergjie nga HEC “Ljusa” brenda datës 29.5.2028, si dhe të informojë ERE-n, çdo tre muaj, në lidhje me fillimin e punimeve të ndërtimit të veprës, por jo më vonë se afati i fundit i vlefshmërisë së VNM-së paraprake, deri më 9.3.2024.

3. Shoqëria “Diezela” sh.p.k. të depozitojë në ERE kontratën e rinovuar të qirasë të lidhur me Bashkinë Burrel brenda datës 24.1.2033 ose regjistrimin në ASHK-në përkatëse të kontratës së nënshkruar me Ministrinë e Infrastrukturës dhe Energjisë.

4. ERE ka të drejtë të rishikojë këtë vendim në çdo kohë, në përputhje me plotësimin/mosplotësimin e kushteve, sipas përcaktimeve dhe afateve si më sipër.

Ky vendim hyn në fuqi menjëherë.

Ky vendim botohet në Fletoren Zyrtare.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

KRYETAR
Petrît Ahmeti